


珍袖

無門關

全

土岐文庫
 文庫17
 W33



157
文庫 17
W33

土岐先生
贈
竹研

北朝道元



惠存

大魯

010185193018

昭和六十年二月一日
土岐善唐氏寄贈

說道無門盡大地人得人說道有門無
阿師分第一強添幾箇註脚大似筮上
頂笠硬要習翁贊揚又是乾竹絞汁著
得這些哮喘本不消習翁一擲一擲莫教
一滴落江湖千里烏雕追不得紹定改
元七月晦習菴陳垣寫



無門

〇一

竹研

紹定二年正月初五日恭遇
天基聖節臣僧慧開預於元年十二月
初五日印行拈提
佛祖機緣四十八則祝延
今上皇帝聖躬萬歲萬歲萬歲
皇帝陛下恭願 聖明齊日月 叡筭
等乾坤八方歌有道之
君四海樂無為之化

慈鑑皇后功德報因佑慈禪寺前往持傳法臣僧慧開謹言 佑一作

禪宗無門關

佛語心為宗無門為法門既是無門且
作麼生透豈不見道從門入者不是家
珍從緣得者始終成壞恁麼說話大似
無風起浪好肉剗瘡何況滯言句覓解
會掉棒打月隔靴爬痒有甚交涉慧開
紹定戊子夏首窠于東嘉龍翔因衲子
請益遂將古人公案作敲門瓦子隨機
引導學者竟爾抄錄不覺成集初不以

無門

〇二

前後叙列共成四十八則通曰無門關
若是箇漢不顧危亡單刀直入八臂那
吒攔他不住縱使西天四七東土二三
只得望風乞命設或躊躇也似隔窻看
馬騎賊得眼來早已蹉過

頌曰

大道無門

千差有路

透得此關

乾坤獨步

佛祖機緣四十八則

佛祖機緣四十八則目錄

- 第一 趙州狗子 第二 百丈野狐
- 第三 俱胝豎指 第四 胡子無鬚
- 第五 香巖上樹 第六 世尊拈華
- 第七 趙州洗鉢 第八 奚仲造車
- 第九 大通智勝 第十 清稅孤貧
- 十一 州勘庵主 十二 巖喚主人

無門

〇三

十三	德山托鉢	十四	南泉斬猫
十五	洞山三頓	十六	鐘聲七條
十七	國師三喚	十八	洞山三斤
十九	平常是道	二十	大力量人
廿一	雲門屎橛	廿二	迦葉利竿
廿三	不思善惡	廿四	離却語言
廿五	三座說法	廿六	二僧卷簾

廿七	不是心佛	廿八	久響龍潭
廿九	非風非幡	三十	卽心卽佛
卅一	趙州勘婆	卅二	外道問佛
卅三	非心非佛	卅四	智不是道
卅五	倩女離魂	卅六	路逢達道
卅七	庭前栢樹	卅八	牛過窻櫺
卅九	雲門話墮	四十	趨倒淨瓶

四一	達磨安心	四二	女子出定
四三	首山竹篋	四四	芭蕉拄杖
四五	他是阿誰	四六	竿頭進步
四七	堯率三關	四八	乾峰一路



無門關

第一 參學比丘 趙州狗子

彌衍 宗紹編

趙州和尚因僧問狗子還有佛性也無
州云無

無門曰參禪須透祖師關妙悟要窮
心路絕祖關不透心路不絕盡是依
草附木精靈且道如何是祖師關只
者一箇無字乃宗門一關也遂目之

無門

〇五

曰禪宗無門關透得過者非但親見
趙州便可與歷代祖師把手共行肩
毛厮結同一眼見同一耳聞豈不慶
快莫有要透關底麼將三百六十骨
節八萬四千毫竅通身起箇疑團參
箇無字晝夜提撕莫作虛無會莫作
有無會如吞了箇熱鐵丸相似吐又
吐不出蕩盡從前惡知惡覺久久純
熟自然內外打成一片如啞子得夢

只許自知驀然打發驚天動地如棄
得關將軍大力入手逢佛殺佛逢祖
殺祖於生死岸頭得大自在向六道
四生中遊戲三昧且作麼生提撕盡
平生氣力舉箇無字若不間斷好似
法燭一點便著

頌曰

狗子佛性
纔涉有無

全提正令
喪身失命

第二 百丈野狐

百丈和尚凡參次，有一老人常隨衆聽法。衆人退，老人亦退。忽一日不退，師遂問面前立者，復是何人。老人云：「諾某甲，非人也。於過去迦葉佛時曾住此山，因學人問大修行底人還落因果也，無某甲對云不落因果，五百生隨野狐身。今請和尚代一轉語，貴脫野狐。」遂問大修行底人還落因果也。無師云：「不昧因果。」

老人於言下大悟，作禮云：「某甲已脫野狐身，住在山後，敢告和尚乞依亡僧事例。師令維那白槌告衆，食後送亡僧大衆言議，一衆皆安。涅槃堂又無人，病何故如是。食後只見師領衆至山後，崑下以杖排出一死野狐，乃依火葬。師至晚，上堂舉前因緣，黃蘗便問：「古人錯祇對一轉語，隨五百生野狐身，轉轉不錯，合作箇甚麼？」師云：「近前來與伊道。」黃蘗遂

近前與師一掌師拍手笑云將謂胡鬚赤更有赤鬚胡

無門曰不落因果爲甚墮野狐不昧因果爲甚脫野狐若向者裏著得一隻眼便知得前百丈贏得風流五百生

頌曰

不落不昧
不昧不落

兩采一賽
千錯萬錯

第三 俱胝豎指

俱胝和尚凡有詰問唯舉一指後有童子因外人問和尚說何法要童子亦豎指頭胝聞遂以刃斷其指童子負痛號哭而去胝復召之童子迴首胝却豎起指童子忽然領悟胝將順世謂衆曰吾得天龍一指頭禪一生受用不盡言訖示滅

無門曰俱胝并童子悟處不在指頭

上若向者裏見得天龍同俱胝并童子與自己一串穿却

頌曰

俱胝鈍置老天龍利刃單提勘小童
巨靈擡手無多子分破華山千萬重

第四 胡子無鬚

或庵曰西天胡子因甚無鬚

無門曰參須實參悟須實悟者箇胡子直須親見一回始得說親見早成

兩箇

頌曰

癡人面前

不可說夢

胡子無鬚

惺惺添懣

第五 香嚴上樹

香嚴和尚云如人上樹口啣樹枝手不攀枝腳不踏樹樹下有人問西來意不對即違他所問若對又喪身失命正恁麼時作麼生對

無門曰縱有懸河之辯總用不著說
得一大藏教亦用不著若向者裏對
得著活却從前死路頭死却從前活
路頭其或未然直待當來問彌勒

頌曰

香嚴真杜撰

惡毒無盡限

啞却衲僧口

通身迸鬼眼

第六 世尊拈華

世尊昔在靈山會上拈華示眾是時眾

皆默然惟迦葉尊者破顏微笑世尊云
吾有正法眼藏涅槃妙心實相無相微
妙法門不立文字教外別傳付囑摩訶
迦葉

無門曰黃面瞿曇傍若無人厭良為
賤懸羊頭賣狗肉將謂多少奇特只
如當時大眾都笑正法眼藏作麼生
傳設使迦葉不笑正法眼藏又作麼
生傳若道正法眼藏有傳授黃面老

無門

〇十

于誑諱閻閻若道無傳授為甚麼獨許迦葉

頌曰

拈起華來

尾巴已露

迦葉破顏

人天罔措

第七 趙州洗鉢

趙州因僧問某甲乍入叢林乞師指示
州云喫粥了也未僧云喫粥了也州云
洗鉢盂去其僧有省

無門曰趙州開口見騰露出心肝者
僧聽事不真喚鐘作甕

頌曰

只為分明極

翻令所得遲

早知燈是火

飯熟已多時

第八 奚仲造車

月庵和尚問僧奚仲造車一百輻拈却
兩頭去却軸明甚麼邊事

無門曰若也直下明得眼似流星機

如掣電

頌曰

機輪轉處

達者猶迷

四維上下

南北東西

第九 大通智勝

興陽讓和尚因僧問大通智勝佛十劫坐道場佛法不現前不得成佛道時如何讓曰其問甚諦當僧云既是坐道場為甚麼不得成佛道讓曰為伊不成佛

無門曰只許老胡知不許老胡會凡夫若知即是聖人聖人若會即是凡夫

頌曰

了身何似了心你得了得心兮身不愁若也身心俱了了神仙何必更封侯

第十 清稅孤貧

作稅銳

曹山和尚因僧問云清稅孤貧乞師眼濟山云稅關黎稅應諾山曰青原白家

酒三盞喫了，猶道：「味沾唇。」

無門曰：「清稅輸機，是何心行？曹山具眼，深辨來機。然雖如是，且道那裏是稅關？」黎喫酒處。

頌曰：

貧似范丹。

氣如項羽。

活計雖無。

敢與鬪富。

十一 州勘庵主

趙州到一庵主處，問：「有麼？有麼？主豎起。」

拳頭。州云：「水淺不是泊船處。」便行。又到一庵主處，云：「有麼？有麼？主亦豎起拳頭。」州云：「能縱能棄，能殺能活，便作禮。」

無門曰：「一般豎起拳頭，為甚麼肯一箇不肯一箇？且道：「誰在甚處？」若向者裏，下得一轉語，便見趙州舌頭無骨，扶起放倒，得大自在。雖然如是爭，奈趙州却被二庵主勘破。若道二庵主有優劣，未具參學眼。若道無優劣。」

無門

〇三

亦未具參學眼

頌曰

眼流星 機掣電 殺人刀 活人劍

十二 巖喚主人

瑞巖彦和尚每日自喚主人公復自應
諾乃云惺惺著喏他時異日莫受人瞞
喏喏

無門曰瑞巖老子自買自賣弄出許
多神頭鬼面何故擊一箇喚底一箇

惺惺底一箇不受人瞞底認著依前
還不是若也恁他總是野狐見解

頌曰

學道之人不識真只為從前認識神
無量劫來生死本癡人喚作本來人

十三 德山托鉢

德山一日托鉢下堂見雪峯問者老漢
鐘未鳴鼓未響托鉢向甚處去山便回
方丈峯舉似巖頭頭云大小德山未會

無門

〇十四

末後句，山聞令侍者喚巖頭來問曰汝不肯老僧那巖頭密啓其意山乃休去明日陞座果與尋常不同巖頭至僧堂前拊掌大笑云且喜得老漢會末後句他後天下人不奈伊何

無門曰若是末後句巖頭德山俱未夢見在檢點將來好似一棚傀儡

頌曰

識得最初句

便會末後句

末後與最初 不是者一句

十四 南泉斬猫

南泉和尚因東西堂爭猫兒泉乃提起云大眾道得卽救道不得卽斬却也衆無對泉遂斬之晚趙州外歸泉舉似州州乃脫履安頭上而出泉云子若在卽救得猫兒

無門曰且道趙州頂草鞋意作麼生若向者裏下得一轉語便見南泉令

不虛行其或未然險

頌曰

趙州若在

倒行此念

棄却刀子

南泉乞命

十五 洞山三頓

雲門因洞山參次門問曰近離甚處山云查渡門曰夏在甚處山云湖南報慈門曰幾時離彼山云八月二十五門曰放汝三頓棒山至明日却上問評昨日

蒙和尚放三頓棒不知過在甚麼處門曰飯袋子江西湖南便恁麼去山於此大悟

無門曰雲門當時便與本分草料使洞山別有生機一路家門不致寂寥一夜在是非海裏著到直待天明再來又與他註破洞山直下悟去未是性燥且問諸人洞山三頓棒合喫不合喫若道合喫草木叢林皆合喫棒

若道不合契，雲門又成誑語。向者裏明得，方與洞山出一口氣。

頌曰

獅子教兒迷，子訣擬前跳躑。早翻身無端再叙，當頭著前箭猶輕。後箭深十六，鐘聲七條。

雲門曰：世界恁麼廣闊，因甚向鐘聲裏披七條。

無門曰：太凡參禪學道，切忌隨聲逐。

色縱使聞聲悟，道見色明心也。是尋常殊不知，衲僧家騎聲蓋色，頭頭上明著著。上妙然雖如是，且道聲來耳畔，耳往聲邊。直饒響寂，及忘致此。如何話會，若將耳聽，應難會。眼處聞聲，方始親。

頌曰

會則事同一家，不會萬別千差。
不會事同一家，會則萬別千差。

十七 國師三喚

國師三喚侍者侍者三應國師云將謂
吾辜負汝元來却是汝辜負吾

無門曰國師三喚舌頭墮地侍者三
應和光吐出國師年老心孤按牛頭
喫草侍者未肯承當羨食不中飽人
食且道那裏是他辜負處國清才子
貴家富小兒嬌

頌曰

鐵枷無孔要人擔累及兒孫不等閑
欲得撐門并拄戶更須赤脚上山
十八 洞山三斤

洞山和尚因僧問如何是佛山云麻三
斤

無門曰洞山老人參得些蚌蛤禪纔
開兩片露出肝腸然雖如是且道向
甚處見洞山

頌曰

突出麻三斤
言親意更親
來說是非者
便是是非人

十九 平常是道

南泉因趙州問如何是道泉云平常心
是道州云還可趣向否泉云擬向即乖
州云不擬爭知是道泉云道不屬知不
屬不知知是妄覺不知是無記若真達
不疑之道猶如大虛廓然洞豁豈可強
是非也州於言下頓悟

無門曰南泉被趙州發問直得瓦解
冰消分疎不下趙州縱饒悟去更參
三十年始得

頌曰

春有百華秋有月夏有涼風冬有雪
若無閑事掛心頭便是人間好時節
二十 大力量人

松源和尚云大力量人因甚擡脚不起
又云開口不在舌頭上

無門曰松源可謂傾腸剝腹只是欠人承當縱饒直下承當正好來無門處喫痛棒何故暫要識真金火裏看

頌曰

擡脚踏翻香水海低頭俯視四禪天一箇渾身無處著請續一句

廿一 雲門屎橛

雲門因僧問如何是佛門云乾屎橛無門曰雲門可謂家貧難辦素食事

忙不及草書動便將屎橛來撐門柱戶佛法興衰可見

頌曰

閃電光 擊石火 眨得眼已蹉過

廿二 迦葉利竿

迦葉因阿難問云世尊傳金襴袈裟外別傳何物葉喚云阿難難應諾葉云倒却門前利竿著

無門曰若向者裏下得一轉語親切

便見靈山，一會儼然未散，其或未然，
毘婆尸佛早留心，直至而今不得妙。

頌曰

問處何如答處親，幾人於此眼生筋。
兄呼弟應揚家醜，不屬陰陽別是春。

廿三 不思善惡

六祖因明上座，趨至大庾嶺。祖見明至，
卽擲衣鉢於石上，云：此衣表信，可力爭。
耶任君將去，明遂舉之。如山不動，踞蹶。

悚慄。明曰：我來求法，非爲衣也。願行者
開示。祖云：不思善，不思惡，正與麼時，那
箇是明？上座本來面目，明當下大悟。遍
體汗流，泣淚作體。問曰：上來密語密意，
外還更有意旨否？祖曰：我今爲汝說者，
卽非密也。汝若返照自己面目，密却在。
汝邊明云：某甲雖在黃梅，隨衆實未省。
自己面目，今蒙指授入處，如人飲水，冷
暖自知。今行者卽是某甲師也。祖云：汝

若如是則吾與汝同師黃梅善自護持
無門曰六祖可謂是事出急家老婆
心切譬如新荔支剥了殼去了核送
在你口裏只要你嚥一嚥

頌曰

描不成兮畫不就贊不及兮休生受
本來面目沒處藏世界壞時渠不朽
廿四 離却語言
風穴和尚因僧問語默涉離微如何通

不犯穴云長憶江南三月裏鷓鴣啼處
百華香

無門曰風穴機如製電得路便行爭
奈坐前人舌頭不斷若向者裏見得
親切自有出身之路且離却語言三
昧道將一句來

頌曰

不露風骨句 未語先分付
進步口喃喃 知君大罔措

無門

〇五

廿五 三座說法

仰山和尚夢見往彌勒所安第三座有一尊者白槌云今日當第三座說法山乃起白槌云摩訶衍法離四句絕百非諦聽諦聽

無門曰且道是說法不說法開口即失閉口又喪不開不開十萬八千

頌曰

白日青天

夢中說夢

捏恠捏恠

誑誑一衆

廿六 二僧卷簾

清涼大法眼因僧齊前上參眼以手指簾時有二僧同去卷簾眼曰一得一失無門曰且道是誰得誰失若向者裏著得一隻眼便知清涼國師敗闕處然雖如是切忌向得失裏商量

頌曰

卷起明明徹大空大空猶未合吾宗

爭似從空都放下，綿綿密密不通風。
廿七 不是心佛

南泉和尚因僧問云：還有不與人說底法麼？泉云：有。僧云：如何是不與人說底法？泉云：不是心，不是佛，不是物。

無門曰：南泉被者，一問直得搯盡家私，即當不少。

廿六 頌曰

叮嚀損君德

無言真有功

任從滄海變

終不為君通

廿八 久響龍潭

龍潭因德山請益，抵夜潭云：夜深子何不下去？山遂珍重揭簾而出，見外面黑却回云：外面黑。潭乃點紙燭度與山擬接潭，便吹滅山於此。忽然有省，便作禮。潭云：子見箇甚麼道理？山云：某甲從今日去，不疑天下老和尚舌頭也。至明日龍潭陞堂云：可中有箇漢，牙如劍樹，口

無門

〇三十四

似血盆一棒打不回頭他時異日向孤
峯頂上立吾道在山遂取疏抄於法堂
前將一炬火提起云竊諸玄辯若一毫
致於大虛竭世樞機似一滴投於巨壑
將疏抄便燒於是禮辭

無門曰德山未出關時心憤憤口悱
悱得得來南方要滅却教外別傳之
旨及到澧州路上問婆子買點心婆
云大德車子內是甚麼文字山云金

剛經抄疏婆云只如經中道過去心
不可得見在心不可得未來心不可
得大德要點那箇心德山被者一問
直得口似匾擔然雖如是未肯向婆
子句下死却遂問婆子近處有甚麼
宗師婆云五里外有龍潭和尚及到
龍潭納盡敗闕可謂是前言不應後
語龍潭大似憐兒不覺醜見他有些
子火種卽忙將惡水驀頭一澆澆殺

冷地看來一場好笑

頌曰

聞名不如見面，見面不如聞名，
雖然救得鼻孔，爭奈瞎却眼睛。

廿九 非風非幡

六祖因風颺利幡，有二僧對論，一云幡動，一云風動，往復曾未契理。祖云：不是風動，不是幡動，仁者心動。二僧悚然。無門曰：不是風動，不是幡動，不是心

動甚處見祖師，若向者裏見得親切，
方知二僧買鐵得金。祖師忍俊不禁，
一場漏逗。

頌曰

風幡心動，一牀領過，
只知開口，不覺話墮。

三十 卽心卽佛一本作卽心是佛

馬祖因大梅問如何，是佛祖云：卽心卽佛。
無門曰：若能直下領略得去，著佛衣。

無門

〇二十六

喫佛飯說佛話行佛行卽是佛也然
雖如是大梅引多少人錯認定盤星
爭知道說箇佛字三日漱口若是箇
漢見說卽心是佛掩耳便走

頌曰

青天白日

切忌尋覓

更問如何

抱賊叫屈

卅一 趙州勘婆

趙州因僧問婆子臺山路向甚處去婆

云慕直去僧纔行三五步婆云好箇師
僧又恁麼去後有僧舉似州州云待我
去與你勘過這婆子明日便去亦如是
問婆亦如是答州歸謂衆曰臺山婆子
我與你勘破了也

無門曰婆子只解坐籌帷幄要且著
賊不知趙州老人善用偷營劫寨之
機又且無大人相檢點將來二俱有
過且道那裏是趙州勘破婆子處

無門

〇三十七

頌曰

問既一般

答亦相似

飯裏有砂

泥中有刺

卅二 外道問佛

世尊因外道問不問有言不問無言世尊據座外道贊歎云世尊大慈大悲開我迷雲令我得入乃具禮而去阿難尋問佛外道有何所證贊歎而去世尊云如世良馬見鞭影而行

無門曰阿難乃佛弟子宛不如外道見解且道外道與佛弟子相去多少

頌曰

劔刃上行 氷稜上走

不涉階梯 懸崖撒手

卅三 非心非佛

馬祖因僧問如何是佛祖曰非心非佛無門曰若向者裏見得參學事畢

頌曰

路逢劍客須呈，不遇詩人莫獻。
逢人且說三分，未可全施一片。

卅四 智不是道

南泉云心不是佛，智不是道。

無門曰南泉可謂老不識羞，纔開真
只家醜外揚，然雖如是，知恩者少。

頌曰

天晴日頭出，雨下地上濕，
盡情都說了，只恐信不及。

卅五 倩女離魂

五祖問僧云倩女離魂那箇是真底

無門曰若向者裏悟得真底便知出

殼入殼如宿旅舍其或未然切莫亂

走驀然地水火風一散如落湯螃蟹

七手八脚那時莫言不道

頌曰

雲月是同，溪山各異，
萬福萬福，是一是二。

無門

卅六 路逢達道

五祖曰路逢達道人，不將語默對，且道將甚麼對？

無門曰：若向者裏對得親切，不妨慶快。其或未然也，須一切處著眼。

頌曰

路逢達道人，不將語默對。

攔腮劈面拳，直下會便會。

卅七 庭前栢樹

趙州因僧問：如何是祖師西來意？州云：庭前栢樹子。

無門曰：若向趙州答處見得親切，前無釋迦後無彌勒。

頌曰

言無展事，語不投機。

承言者喪，滯句者迷。

卅八 牛過窻櫺

五祖曰：譬如水牯牛過窻櫺，頭角四蹄

無明

〇三十

都過了，因甚麼尾巴過不得

無門曰：若向者裏顛倒，著得一隻眼，下得一轉語，可以上報四恩，下資三有，其或未然，更須照顧尾巴始得。

頌曰

過去墮坑塹，回來却被壞。

者些尾巴子，直是甚奇怪。

卅九 雲門話隨

雲門因僧問：光明寂照遍河沙，一句未

絕門邊曰：豈不是張拙秀才語？僧云：是門云話隨也。後來死心拈云：且道那裏是者僧話隨處。

無門曰：若向者裏見得雲門用處，孤危者僧因甚話隨堪與人天為師？若也，未明自救不了。

頌曰

急流垂鉤，貪餌者著。

口縫纜開，性命喪却。

無明

〇三十一

四十 趨倒淨瓶

為山和尚始在百丈會中充典座百丈
將選大為主人乃請同首座對眾下語
出格者可往百丈遂拈淨瓶置地上設
問云不得喚作淨瓶汝喚作甚麼首座
乃云不可喚作木楔也百丈却問於山
山乃趨倒淨瓶而去百丈笑云第一座
輸却山子也因命之為開山
無門曰為山一期之勇爭奈跳百丈

圈圍不出檢點將來便重不便輕何
故暫脫得盤頭擔起鉢枷

頌曰

颺下笊籬并木杓當陽一突絕周遮
百丈重關攔不住脚尖趨出佛如麻

四一 達磨安心

達磨面壁二祖立雪斷臂云弟子心未
安乞師安心磨云將心來與汝安祖云
覓心了不可得磨云為汝安心竟

無門曰缺齒老胡，十万里航海持持，而來可謂是無風起浪末，後接得一箇門人，又却六根不具，喚謝三，卽不識四字。

頌曰

西來直指

事因囑起

撓聒叢林

元來是你

四二 女子出定

世尊昔因文殊至諸佛集處，值諸佛各

還本處，惟有一女人，近彼佛坐，入於三昧。文殊乃白佛云：何女人得近佛坐而我不得佛告文殊：汝但覺此女，令從三昧起。汝自問之。文殊遶女人，三匝，鳴指一下，乃托至梵天，盡其神力，而不能出世。尊云：假使百千文殊，亦出此女人，定不得下方。過一十二億河沙國土，有罔明菩薩，能出此女人，定須臾罔明大士從地湧出，禮拜世尊。世尊勅罔明却至。

女人前，嗚指一下，女人於是從定而出。無門曰：釋迦老子做者，一場雜劇，不通小小，且道文殊是七佛之師，因甚出女人定，不得罔明初地，菩薩為甚却出得？若向者裏見得親切業識，忙忙那伽大定。

頌曰

出得出不得，渠儂得自由，
神頭并鬼面，敗闕當風流。

四三 首山竹篋

首山和尚拈竹篋示眾云：汝等諸人，若喚作竹篋，則觸；不喚作竹篋，則背。汝諸人，且道喚作甚麼。

無門曰：喚作竹篋，則觸；不喚作竹篋，則背。不得有語，不得無語。速道，速道。

頌曰

拈起竹篋，行殺活令，
背觸交馳，佛祖乞命。

四四 芭蕉拄杖

芭蕉和尚示眾云你有拄杖子我與你
拄杖子你無拄杖子我棄你拄杖子
無門曰扶過斷橋水伴歸無月村若
喚作拄杖入地獄如箭

頌曰

諸方深與淺

都在掌握中

撐天并拄地

隨處振宗風

四五 他是阿誰

東山演師祖曰釋迦彌勒猶是他奴且
道他是阿誰

無門曰若也見得他分曉譬如十字
街頭撞見親爺相似更不須問別人
道是與不是

頌曰

他弓莫挽

他馬莫騎

他非莫辨

他事莫知

四六 竿頭進步

無門

石霜和尚云百尺竿頭如何進步又古
德云百尺竿頭坐底人雖然得人未爲
真百尺竿頭須進步十方世界現全身
無門曰進得步翻得身更嫌何處不
稱尊然雖如是且道百尺竿頭如何
進步噯

頌曰

瞎却頂門眼
拚身能捨命

錯認定盤星
一盲引衆盲

四七 兜率三關

兜率悅和尚設三關問學者

撥草

參玄只圖見性卽今上人性在甚處

識得自性方脫生死眼光落時作麼

生脫生脫得生死便知去處四大分

離向甚處去

無門曰若能下得此三轉語便可以
隨處作主遇緣卽宗其或未然麤食
易飽細嚼難飢

頌曰

一念普觀無量劫無量劫事卽如今
如今觀破箇一念觀破如今觀底人

四八 乾峯一路

乾峯和尚因僧問十方薄伽梵一路涅槃門未審路頭在甚麼處峯拈起柱杖劃一劃云在者裏後僧請益雲門門拈起扇子云扇子踔跳上三十三天築著帝釋鼻孔東海鯉魚打一棒雨似盆傾

無門曰一人向深深海底行簸土揚塵一人於高高山頂立白浪溜天把定放行各出一隻手扶豎宗乘大似兩箇馳子相撞著世上應無直底人正眼觀來二大老總未識路頭在

頌曰

未舉步時先已到未動舌時先說了
直饒著著在機先更須知有向上竅

從上佛祖垂示機緣據款結案初無
到語揭翻腦蓋露出眼睛肯要諸人
直下承當不從它覓若是通方上士
纔聞舉著便知落處了無門戶可入
亦無階級可升掉臂度關不問關吏
豈不見玄沙道無門解脫之門無意
道人之意又白雲道明明知道只是
者箇爲甚麼透不過恁麼說話也是
赤土搽牛姪若透得無門關早是鈍

置無門若透不得無門關亦乃辜負
自己所謂涅槃心易曉差別智難明
明得差別智家國自安寧時紹定改
元解制前五日揚歧八世孫無門比
丘慧開謹識

無門關卷終

禪箴


循規守矩無繩自縛縱橫無碍外道魔
軍存心澄寂默照邪禪恣意忘緣墮落
深坑惺惺不昧帶鎖擔枷思善思惡地
獄天堂佛見法見二鍊圍山念起即覺
弄精魂漢兀然習定鬼家活計進則迷
理退則乖宗不進不退有氣死人且道
如何履踐努力今生須了却莫教永劫
受餘殃

黃龍三關

我手何似佛手摸得枕頭背後不覺大
笑呵呵元來通身是手
我脚何似驢脚未舉步時踏著一任四
海橫行倒跨揚岐三脚
人人有箇生緣各各透徹機先那吒折
骨還父五祖豈藉爺緣
佛手驢脚生緣非佛非道非禪莫怪無
門關險結盡衲子深寬


瑞巖近日有無門撥向繩床判古今凡
 聖路頭俱截斷幾多蟠螫起雷音請
 無門首座立僧山偈奉謝紹定庚寅
 季春無量宗壽書

達摩西來不執文字直指人心見性成
 佛說箇直指已是迂曲更言成佛即當
 不少既是無門因甚有關老婆心切惡
 聲流布無庵欲贅一語又成四十九則
 其間些子誦訛剔起眉毛薦取淳祐乙



已夏重刊

檢校少保寧武軍節度使京湖安撫制置大使兼屯田大使
 兼夔路策應大使兼知江陵府漢東郡開國公食邑二千一
 百戶食實封陸伯戶孟拱跋



無門老禪作四十八則語判斷古德公
 案大似賣油餅人令買家開口接了更

無門

○翠

吞吐不得然雖如是安晚欲就渠熱爐
熬上再打一枚足成大衍之數却仍前
送似未知
老師從何處下牙如一口喫得放光動
地若猶未也連見在四十八箇都成熱
沙去速道速道

第四十九則語

經云止止不須說我法妙難思安晚曰
法從何來妙從何有說時又作麼生豈

但豐于饒舌元是釋迦多口這老子造
作妖怪令千百代兒孫被葛藤纏倒未
得頭出似這般音特話靶匙挑不上甌
蒸不熟有多少錯認底傍人問云畢竟
作如何結斷安晚合十指爪曰止止不
須說我法妙難思却急去難思兩字上
打箇小圓相子指示衆人大藏五千卷
維摩不二門總在裏許

頌曰



語火是燈

惟賊識賊

掉頭弗饗

一問即承

淳祐丙午季夏初吉安晚居上書于西湖漁莊



明治十五年七月廿二日出版御届
同年八月刻成發兌

編輯兼
出版人

石川縣平民

近八郎右衛門

金澤區橫安江町
百九番地

同支店

同區上堤町
二十八番地

